

Gherdëina cun la troht

Na bela defileda de trohtes iel stat da udëi tl raion da ji a pe te S. Cristina. Truap turisc ma nce jënt da tlo ie unida adalerch per ti cialé al bel guant dala gherdëina, scuté su la mujiga, udëi i bai popoules y festejé deberieda



Mutans dala gherlanda spiza. Mutons cun la troht.



Mutons dal ciapel vërt.



La troht de l'ava y nêine.

Cultura - Uni ann ie la bela defileda de trohtes te n auter luech dla valeda, chëst ann te S. Cristina. Tl raion da ji a pe iel unit adalerch ai 5 de agost truap turisc, ma nce jënt da tlo, per amiré l bel guant dala gherdëina. L ie uni pià via dala cater dan la Cësa de Chemun de S. Cristina per fé la defileda de guanc. Mutans dala gherlanda spiza y mutons dala brea de pel, jëunes dal ciapel vërt, ëiles cun la bagana y monce la troht da l'ava y nêine fova da udëi. Pra "Gröden in Tracht", coche n ti dij per tudësch, pudoven nce udëi la defileda da noza coche la fova zacan, la Mujighes da Bula, de Urtijëi, de S. Cristina y de Sëlva y la Lia di Balarins de Urtijëi y chëla de Sëlva y S. Cristina, ma nce vedli mestieres dla valeda. La vita da ntlëuta ie unida mustreda cun jënt trata sëura

da zacan. N pudova se fé n'idea de coche l fova a fé fansëch, coche fova l lëur tl ciamp y tl bosch, l ustaria da zacan, l lëur te stua, l ji a crëp y l ji cun i schi y d'autra ativeiteis dla vita da zacan. Do la defileda pudoven audi plu cunzerch y se renfurzé y se la dé bona cun vel'bon bucon o zeche da beber. Cun la trohtes univel zacan mustrà uni grupa dla sozietà. Aldò d'l'età o dla situazion de familia mudova l guant.

Mantenì la tradizions

La Lies Guanc dala gherdëina cëla de teni su cun lezitënza, manteni y mpresté ora i biei guanc dala gherdëina che ie unic scinchei ala Lies da benfatëures o che ie unic cumprei dala Lies cun contribuc publics. La Lies ulëssa

fé a l savëi cie che n sà dl guant dala gherdëina a jënt nteresseda, dantaldut ala generazions che vën do y de manteni la vedla tradizions. Per arjonjer chësc fej la Lies Guanc dala gherdëina daniëura pea pra manifestazions y pruzescions y oradechël vëniel nce teni uni ann n curs per mparé a tré sëura l guant dala gherdëina.

L ie bel che l vënie lascià udëi i guanc, la mujiga, i bai y la vita da zacan n generel. L ie nteressant a udëi tant che la sozietà se à mudà nchin sën, ma che la tradizions y la cultura viv mo for. Perchel ti va n gra de cuer ala Lia per l Turism, ai Destudafuech de S. Cristina, ala Lies di guanc dala gherdëina y a duta la lies che à njenià ca y fat pea pra chësta festa particulera.

Sofia Stuflesser



La Mujighes à sunà deberieda tl zënter Iman.



I balarins se dà n pe tl cul.



Turisc y chëi da tlo à fat festa deberieda.



N ciaval che tira n erpesc.



L ziplé te Gherdëina.



La bagana.



La Grupa da Bal de Sëlva y S. Cristina.



I ambolc y l diretëur de Val Gardena Marketing.



La moderadëura y l dauni.



L bas susafonn.